

中國邊疆史志集成

東北史志

第三部

6

全國圖書館文獻縮微復制中心

中國邊疆史志集成

東北史志

第三部
6

全國圖書館文獻
縮微復制中心

墾務交涉篇

東三省廣漠華離田野腴沃沿邊一帶土民之從事耕植者寥寥若晨星萬里荒蕪荊榛滿目天地自然之利忽然委棄不加顧惜而東北鄰俄東南接韓兩國邊氓乘我之不意越畔墾闢源源而來以養其身以長其子孫蓋亦有年於茲矣今中國內地生齒日繁久已人滿爲患欲爲移民就墾之策惟恃東省以爲尾閭其爲我國將來之大殖民場固有可預決者藉非綢繆未雨以保權利而固邊疆恐地廣而荒復因之以四郊多壘其於內政外交動相牽掣固不可不防微而杜漸也且韓弱國也俄強國也韓本藩服之邦地瘠民貧百姓困苦流離轉徙至於邊境由是相率墾荒自食其力及其成熟則許以升科租賦一視同仁未分畛域數百年來韓之民固有此閒樂不思蜀之勢自日俄交戰韓人歸日保護日人以苛待屬國之政策束縛韓民之自由故其民之思脫羈絆入我國籍者往往而有近歲以來薙髮易服甘心歸化者益夥類能遵守法紀受我約束而日人窺邊圉之空虛竊萌侵略之志遂藉口保護韓民設官調兵爲反客爲主之計若不早定防閑嚴其限制恐韓僑託足之地

卽爲日人竊據之區矣至於俄人得尺得寸久蓄野心鐵道旣通其輸送貧民來東者歲以千萬計多一越境之民卽增一失地之懼蔓延日久遺害無窮尤當援據約章堅拒侵越以杜其無厭之心若夫內政之措施則清丈以正經界招墾以闢莽荒遷民以實邊遠要皆不容稍緩之圖又或選撥駐防旂民編爲屯軍以爲屯田守邊之計旣以靖萑苻之寇亦以防侵侮之來其於交涉之辯爭固亦可消弭於無形也

紀韓僑越墾

朝鮮居鴨綠江之左與東省臨江輯安通化懷仁諸邑僅隔一衣帶水望衡對宇一葦可杭入冬後江水凝結尤易渡越而沿江右岸中國領土迄長白山一帶居民稀少山林深密距今二千年來韓民越界墾荒者比比皆是其後來者益衆聚處耕作幾同土著光緒三十三年冬臨江知州鄭鴻勳報稱鴨綠江左岸韓人與日本守備隊構衅迺飭巡防營務處派隊赴臨扼要防堵以免敗兵入界竄擾勾結越墾韓民並牒領隊日員約束其部下軍士勿得越界追剿三十四年五月令總統吳光新赴興京等處考察越墾韓民情形光新歸具言鴨綠江右岸及長白山一帶韓人開墾地畝及租地耕種者甚多強半攜家而來築室居住宜由地方官吏調查戶口編成冊籍加以保護課其賦稅使之歸化未幾果有韓僑金寬燾等詣臨江縣請入籍先是鴨綠江左岸韓人爲日軍擊敗日人藉搜查軍火爲詞曾屢渡江滋擾諸韓中有前韓國厚昌郡守金寬燾者素爲衆所推至是率其屬來歸七月籌備長白府設治事宜知府張鳳台報稱日人在鴨綠江右岸勒選韓僑爲兵已向其炮兵太尉青山貞

次郎面詰止之尋又遣間諜乘夜渡江以危詞啊喝韓衆逼檄 興京臨江輯安通
化懷仁各屬以外人入境及願歸籍者本國須盡保護之責保護不周卽生交涉關
繫非淺而實行保護之法必以清查戶口爲先鴨綠江右岸一帶韓人携眷越壑者
甚多現擬妥定善後章程各屬務須迅速調查所轄地方韓僑戶口若干所執何業
及姓名籍貫分別入籍居留二種列表呈送以期主客相安各得其所十月復令奉
天交涉司陶大均民政司張元奇會議處置韓僑事宜因念甲辰之役有約各國均
向日本聲明凡與韓國所訂條約仍須遵守則中韓交涉亦應查照向章辦理按韓
約第十二款邊民已經越壑者聽其安業俾保性命財產以後如有潛越邊界者彼
此均應禁止以免滋生事端是韓民之已至者自應照約許其安業編查入籍歸我
保護現在宜安置先至者以清其源限制後來者以塞其流凡韓民自十五年前入
境墾田殖有產業者查明戶口人丁姓名年貌籍貫住址一一編入冊籍任其雜髮
易服各自安業歸我保護與中國人民享同等之利益卽與中國人民盡同等之義
務應納糧服役毋有抗違其或雖無產業而入境日久爲人僱役者卽由僱主出具

保狀呈明地方官編入客籍聽其雜髮易服亦須遵守法令犯者悉按中律懲治此清源之法也沿邊郡邑由地方官傳諭各社首村長地保人等隨時稽查若韓人願居內地察其人尙馴良力任耕作者許查明姓名來歷有無眷屬呈報地方官註冊居留發給執照但聽受人僱役不得占地墾種及設肆販賣並酌收冊照費以潛遏韓人之游手無藝成羣結黨而來者煽惑其間致滋事故其入境年久不願入籍者亦卽仿此辦法尙自稱游歷而無執照者照章不得逾三閱月過期驅逐出境仍令地方官督率社首等隨時查察辦理良以村堡人民朝夕聚處異言異服之人莫由掩飾尤便稽查此塞流之法也至於人稀地曠之區需用韓民開墾亦應照此二法或編入冊籍或給以執照酌予官田明定租額要在地方官吏因時制宜而已議既定世昌以韓約既有已越墾者聽其安業之文自不宜出於強迫復有以後潛越邊界均應禁止之文自應如約實施不必變通辦理況我國國籍法尙未規定若遽行迫令入籍在我無所遵守日人反得起而干涉或藉爲內間種種流弊不可不防酌定適宜辦法莫如遵守約章已來者令其安業未至者嚴禁越境並將現有韓僑戶

籍實行清查爲嚴杜將來之計畫在韓僑墾地食租已享我國同等利益卽須受我國同等法律雖未易服薙髮亦同在民人保護之中其自願易服薙髮者聽之總之入籍與否以韓人之請願爲斷無事逼其服從編查戶籍爲整理內政之機關於外交更無牽涉庶措置持平而隱患可弭爰令民政司另訂詳章督同地方有司妥慎籌辦十一月駐奉日本岡部總領事牒稱臨江縣令李廷玉虐待鴨綠江右岸韓民強令易服薙髮不從者擯逐回韓沒其財產現在僑居之韓民已渡江乞駐韓日員保護請速查禁迺檄臨江縣將辦理情形報告並飭東邊道沈桐馳書告誡各屬略謂韓民在我境內由來已久曩者



朝廷一視同仁無分畛域自韓屬於日日人遇之不免苛虐韓人企慕華風情殷內嚮我如力任保護綏之以德撫之以柔韓民自甘歸化然後令改冠服編入版籍日人亦自無詞若迫以法令使易裝束一時恩信未孚彼必抗拒若再強迫出境禁其攜帶資糧日人反從而市恩爲之請命此非綏邊之長策也尤有慮者沿江上下華民之居彼界尙不乏人若彼報以所施則驟增此無數失業之貧民在我亦何從安集

嗣後凡韓人居留境內祇須守我法律不得故爲歧視彼懼日人而庇我宇下情殊可矜若加之屏絕彼將爲無告之窮民更何倚賴此亦仁人君子所當軫念者也無何我國駐韓總領事馬廷堯亦以書來告謂日本駐韓統監府外務部長鍋島桂次郎函稱鴨綠江上游右岸臨江輯安等縣所轄由帽兒山至十八道溝一帶韓人通稱爲西墾島或稱西邊界數百年來韓人越墾甚多綜計已及數萬乃近來貴國地方官吏不特不妥爲保護反多方苛待現接各處報告又強迫僑居韓民入籍易裝不從則勒令歸國所有財物不得攜回其留者則頒發示諭令其繳稅如此情形實有違清韓通商條約第十二條所定之章程本應由我國政府與貴國政府直接交涉但貴國適當

大喪之際如與北京政府交涉殊非合理請轉告地方官吏務使僑居韓人得以相安等語迺復馬廷堯書爲言保護韓僑善後政策比已詳細會商務期因時制宜犁然各當而尤以遵守中韓條約不相背謬爲宗旨固未嘗行強迫入籍易服及納稅主義至韓僑之自願易服薙髮者則在所不拒凡斯操縱期於執行條約無非爲永綏邊服

鞏固邦交起見往者駐奉日岡部總領事亦以臨江縣虐待韓僑等情馳書來爭因念清韓互市有年自宜維持和平以固交誼已將此意令各郡邑妥善辦理請轉告日員十二月輯安知縣朱淑新報稱東洋拓殖會社成立以來種種規畫已詳見中東各報該會社總裁松崎氏等曾赴北韓巡視一周卽籌畫北韓農場之配置除韓屬領土外若圖們江沿岸及長白山一帶亦擬如韓國內地辦法將我境內韓民越墾之地畝攤給新住之日民每屯十家者亦按十分之二或三插入已令統監派出所將該處韓民戶口冊移報並擬將六道溝等處凡有韓民村落之所盡改地名爲某町幾番以便拓殖事務着手區分之識別至該事務所出張之期與實行開始之日尙待伊藤返韓會議始行定議又聞該總裁調查表所列由六道溝至頭道溝已爲韓民耕墾者其面積約五萬二千七百丁步將來可耕地約三十一萬至三十七萬丁步須移農民四千五百餘人款百八十餘萬圓至長白府屬一帶日人擬派憲兵一中隊名曰補助憲兵隊在韓京招募韓人充當兵卒而以日人井上荒太郎爲之隊長傳聞墾墾似非無因等語因思各報所載雖言之有故而亦不無虛聲喝喝

之辭我苟無隙可乘他人豈能藉端要挾計惟力圖自治於瀕邊各境創立學堂添練巡警勸墾牧興利除弊不尙虛文至撫綏韓僑尤當恪守約章推誠相與不宜操之過蹙致費周章爰本此旨通戒奉吉兩省鄰韓各邑切實遵行並令將韓民戶口清查編成冊籍列表彙送蓋將以爲殖民之預計杜外侮之潛滋胥在是矣



紀俄人越墾

環球各國日事競爭經營殖民類皆遠慮深謀不遺餘力其鯨吞蠶食以占有他國領土者往往借越墾發其端東省與俄毘連吉林東北隅尤爲接壤鐵路交通而後俄人之移民而至者絡繹不絕沿邊各境地廣人稀本省居民昧於耕種之利以致他族潛來墾闢日益增多既未奉官吏明文亦不遵界務條約長此放任不加防制微特主權妨礙抑恐後患無窮世昌竊以爲憂吉林既設行省始除鄧邦述爲交涉司於其行也以調查越墾勛之光緒三十四年九月邦述乃檄鄰邊郡邑各就境內稽察俄民越墾情形詳查填報無何依蘭府報稱府屬地方近處尙無俄人越墾情事惟曩者奉檄巡邊由拉哈蘇蘇至饒力河由饒力河至呢嗎等處探悉烏蘇里江一帶環抱俄境千有餘里江西爲我界江東爲俄土江西饒力溝東南小清河地方時有俄人越渡私墾依蘭呢嗎八百餘里深恐兼顧難周非在呢嗎饒力溝兩處分設招墾局兼理詞訟交涉及徵收稅務另簡幹員治理不可交涉司以呢嗎距府治八百餘里塗路阻修恐亦鞭長莫及而蜂窠山墾務分局相去僅四百里不若改歸

蜜山府管轄庶幾控制得宜可收指臂之效是年十二月又據臨江州牒報州境烏蘇里江木城地方有俄人謝木恩別羅克雷羅夫並帕爲勒肇資闊挪夫二名於光緒三十二年在彼處私墾地三晌五畝雖未建築房屋亦無他項物業但俄人私行越墾與界務約章不合已將俄人驅逐並移牒俄邊界官協同禁止要之俄人窺伺吉江凡路礦森林航業關稅以至於牧羊刈草迭起爭端者業已不勝枚舉而墾務一事尤數以韓民爲藉口我苟漠然不顧其實偪處此之勢必將滋蔓而難圖惟思患預防保我固有疆土而籌邊之策尤以清界址守約章爲當務之急云


東三省政略卷三

交涉 目錄

漁業交涉篇

紀日人侵擾鮫魚圈等處漁業

紀高景賢全案始末



漁業交涉篇

漁業爲一國自然之利卽爲一國獨享之權此公法所共認也泰西各國海岸毘連鄰海諸邦多有訂立漁業專約者蓋重漁權卽所以重海權也日人藉戰勝強俄之勢攫租借旅大之權於海濱漁利尤耽耽不已由是阿部野利恭森崎前會本間錠吉等糾合沿海奸民購船置械巧立名目若清利公司若關東洲水產組合若遠洋漁業團先後逼脅漁民征歛捐稅中國官吏據理抗爭而日人多方狡辯始則託詞軍用繼則以高景賢之死要索賠償終復屢求減稅又揚言領海公海之說冀陰行其侵奪漁利之謀曩與日萩原總領事會議漁業時巡撫唐紹怡謂之曰貴總領事應知領海係國家之產與內地無異質言之不啻國家養魚之池但供民人食用外人不得干預也諒哉斯言可以折日人之喙而息日人之貪矣夫遼海一帶爲中國內洋之區凡產自海中者無非中國所獨有匪惟漁民生計所賴固所必爭而主權存亡之機卽於此分焉且漁業事之小者耳乃猶歷數年之交涉唇焦舌敝始獲保存則夫保護漁戶振興公司提倡之鼓舞之以求改良擴充之方生瀕海無窮之利